

## **Regulamento para a creación e funcionamento do rexistro municipal de unión de parellas de feito no Concello de Pontedeume.**

### **Exposición de motivos**

O libre desenvolvemento da personalidade e a igualdade ante a Lei dos cidadáns constitúe un dos principios fundamentais do noso ordenamento xurídico e social, demanda de tódolos poderes públicos a promoción das condicións para que esa liberdade e igualdade das persoas e dos grupos en que se integran sexan reais e efectivas, debendo, polo tanto, ser removidos os obstáculos que impidan ou dificulten a súa plenitude conforme ó previsto nos artigos 1.1, 9.2, 10.1 e 14 da Constitución española e o Estatuto de autonomía.

Así mesmo, no libre e lexítimo exercicio da súa autonomía persoal, todo home e toda muller teñen dereito a constituír, mediante unha unión afectiva de convivencia unha comunidade de vida que, completada ou non con fillos, dea lugar á creación dunha familia, a protección da cal deben asegurar-los poderes públicos de conformidade co artigo 39.1 da Constitución, co fin de garanti-lo respecto e a promoción dos anteditos principios fundamentais de libre desenvolvemento da personalidade e da igualdade de tódolos cidadáns.

As unións afectivas contituídas por parellas do mesmo sexo, unha vez superadas as discriminacións históricas por razóns de orientación sexual que viñeron marxinando, e incluso criminalizando, a que demandan unha vida en común con outra persoa do mesmo sexo, deben acadar polos mesmos fundamentos a súa protección, de acordo coa existencia constitucional de igualdade e liberdade dirixidas a tódolos poderes públicos.

O presente Regulamento municipal de parellas de feito intenta cubrir unha demanda social polo que o seu obxecto é o de ofrecer un instrumento e un servizo eficaz que favoreza a non discriminación das persoas que se relacionan mediante unións de feito, procurándose que queden determinadas as regras básicas de funcionamento do Rexistro de Unións de Feito no ámbito territorial do Concello de Pontedeume.

En todo caso, o funcionamento do rexistro deberá salvagardar, no marco da lexislación vixente, o dereito á intimidade das persoas.

Na súa virtude,

Considerando que o artigo 39 da Constitución española concibe e ampara á familia como relación de convivencia mutua non nada exclusivamente de matrimonio.

Considerando que deste xeito a vixente Lei 29/1994, do 24 de novembro, sobre arrendamentos urbanos outórgalle dereitos de continua-lo arrendamento, nos artigos 12.4, e o dereito de subrogación no artigo 16.1b), "á persoa que convivise co arrendatario de forma permanente en análoga relación de afectividade coa do cónxuxe, con independencia da súa orientación sexual, durante, polo menos, os dous anos anteriores....".

Considerando que é competencia dos concellos "prestar cantos servizos públicos contribúan a satisfacer-las necesidades e aspiracións da comunidade vecinal" e "a prestación dos servizos sociais..." (artigo 25 da Lei 7/85, do 2 de abril), e ostentando o alcalde non só a potestade de dirixi-los servizos, senón tamén a potestade residual a teor do artigo 21.1.m) da devandita lei.

Establécese o seguinte:

## **REGULAMENTO DE CREACIÓN E FUNCIONAMENTO DO REXISTRO MUNICIPAL DE UNIÓN DE PARELLAS DE FEITO NO CONCELLO DE PONTEDEUME.**

### **Artigo 1. Obxecto.**

1.- O Concello de Pontedeume crea o rexistro municipal de unión de parellas de feito para o cumprimento das competencias propias deste.

2.- O rexistro de unións de feito terá carácter administrativo e voluntario, rexerese polo presente regulamento e demais disposicións que poidan dictarse no seu desenvolvemento.

### **Artigo 2. Ámbito.**

Terán acceso a este rexistro as unións non matrimoniais de convivencia de parellas ser prexuízo da súa orientación sexual, que teñan a súa residencia habitual no territorio de Pontedeume.

### **Artigo 3. Requisitos das inscricións.**

3.1.- As inscricións realizáranse previa solicitude conxunta dos membros da unión de feito e a esta achegarase declaración de cumprir os requisitos esixidos, e no seu caso a documentación acreditativa do cumprimento dos seguintes requisitos:

1.- Ser ambos membros da unión maiores de idade ou menores emancipados, acreditándose mediante fotocopia do documento nacional de identidade ou documentos acreditativos da emancipación, de conformidade co establecido no artigo 314 do Código Civil.

2.- Non ter relación ou parentesco por consanguinidade ou adopción en liña recta ou liña colateral en segundo grao.

3.- Non ter sido declarados incapacitados ou estar incursos nas prohibicións recollidas nos artigos 46 e 47 do Código Civil, achegando declaración responsable para tal efecto.

4.- Non estar ligados con vínculo matrimonial.

5.- Declaración responsable de non figurar inscrito como membro doutra unión de feito ou rexistro similar noutra administración, non cancelada.

6.- Ademais dos requisitos anteriores, cando menos un dos membros da unión deberá estar empadroadado no Concello de Pontedeume pola súa condición de residente habitual no mesmo. O outro membro da parella deberá tramita-lo empadramento con posterioridade á inscrición no presente rexistro.

3.2.- A solicitude e declaración formalizaranse nos modelos normalizados que figuran como anexo ó presente Regulamento.

3.3.- Acreditados os requisitos sinalados no punto anterior, a inscrición levarase a cabo mediante comparecencia persoal e conxunta, ante o funcionario encargado do Rexistro, con declaración formal da existencia da unión de feito e expresión da súa conformidade, asinado ésta.

### **Artigo 4. Declaración e actos inscribibles.**

Serán obxecto de inscrición:

1.- A constitución e extinción das unións de feito.

2.- Os contratos reguladores das relacións persoais e patrimoniais entre os membros das unións de feito.

3.- Non poderá practicarse inscrición ningunha no Rexistro sen o consentimento conxunto dos membros da unión de feito, agás o previsto no apartado segundo do artigo 5 deste regulamento.

### **Artigo 5.- Extinción ou disolución.**

As unións estables obxecto do presente rexistro, extinguíranse polos seguintes motivos:

1.- De común acordo, mediante declaración conxunta.

2.- A instancia dun só dos seus membros, sendo necesario para a disolución efectiva demostrar que o feito está en coñecemento das dúas partes, ou exclusivamente da parte que propón a disolución de estar demostrado o abandono efectivo da convivencia coa parella a través de documentos que así o acrediten (baixa no padrón de habitantes, cambio de enderezo ou acta notarial) notificándoo fehacientemente ó outro.

3.- Por defunción ou declaración de falecemento dun dos membros da unión de feito.

4.- Por matrimonio dun dos membros.

### **Artigo 6. Efectos.**

A inscrición no rexistro declara actos rexistrados pero non afecta á súa validez nin ós efectos xurídicos que lle sexan propios, que se producen á marxe do mesmo.

### **Artigo 7. Publicidade.**

1.- Co fin de garanti-la intimidade persoal e familiar das e dos inscritos no rexistro, non se dará publicidade ningunha ó contido dos asentos, agás as certificacións que expida o secretario co visto e praxe do alcalde-presidente, a instancia exclusivamente de calquera dos membros da unión interesada, ou dos xuíces e tribunais de xustiza.

2. O acceso ó rexistro efectuarase de acordo coas normas xerais vixentes ó respecto.

### **Artigo 8. Órgano competente.**

O rexistro estará a cargo da Secretaría do Concello e dependerá da Alcadía Presidencia.

### **Artigo 9. Materialización.**

1.- O rexistro materializarase nun libro xeral no que se practicarán as inscricións ás que se refiren os artigos precedentes. As devanditas inscricións reflectirán o contido da declaración conxunta feita previamente pola parella na folia asinada por esta.

2.- O libro está formado por follas móbiles, foliadas e seladas, legalizadas polas rúbricas da Alcadía e Secretaría do Concello, e estará encabezada e rematará coas correspondentes dilixencias de apertura e peche extendidas pola Secretaria, co visto e praxe do Alcalde.

### **Artigo 10. Inscrición.**

A primeira inscrición de cada parella terá o carácter de inscrición básica e na marxe desta anotarase referencia a calquera outro asento que se produza con posterioridade no libro xeral principal relativo a esa unión.

### **Artigo 11. Libro auxiliar.**

O rexistro terá tamén un libro auxiliar, ordenado por apelidos, das persoas inscritas, no que se expresará o número das páxinas do libro xeral nas que existan anotacións que lles afecte.

### **Artigo 12. Gratuidade.**

As inscricións que se practiquen e as certificacións que se expidan serán gratuitas, agás ordenanza reguladora ou disposición contraria

### **Disposición final.**

1.- Autorízase ó alcalde-presidente para dictar cantas disposicións sexan precisas para o mellor desenvolvemento e execución do presente regulamento.

2.- O presente Regulamento entrará en vigor unha vez publicado íntegramente su texto no Boletín Oficial da Provincia, de conformidade co disposto no artigo 70.2 da Lei 7/1985, de 2 de abril, reguladora das bases do réxime local, e transcorra o prazo de 15 días hábile sprevisto no artigo 65.2 da devandita Lei, e permanecerá en vigor ata a súa modificación ou derogación expresa.